

國
朝
詞
綜

國朝詞綜卷八

青浦王昶纂

朱彝尊 六十五首

朱彝尊

字錫鬯號竹垞秀水人康熙十八年以布衣召試博學鴻詞授檢討有江湖載酒集三

卷靜志居琴趣一卷茶煙閣

體物集二卷菡錦集一卷

李分虎云竹垞詞雖多艷語然皆一歸雅正不若屯田樂章徒以香澤爲工者詞而豔能如竹垞斯可矣沈融谷云竹垞博搜唐宋金元人集以輯詞綜一洗草堂之陋其詞句琢字鍊歸于醇雅雖起白石梅溪諸家爲之無以過也杜紫綸云竹垞詞神明乎姜史刻削雋永本朝作者雖多莫有過焉者

解珮令 自題詞集

十年磨劍五陵結客把平生涕淚都飄盡老去填詞一
半是空中傳恨幾曾圍燕釵蟬鬢不師秦七不師黃
九倚新聲玉田差近落拓江湖且分付歌筵紅粉料封
侯白頭無分

霜天曉角

早秋放鶴洲絕上作

青桐垂乳容易凝珠露一縷金風飄落添幾點豆花雨
簾戶翦燈語草蟲飛不去坐愛水亭香氣是藕葉最
多處

桂殿秋

思往事渡江干青蛾低映越山看其眠一舸聽秋雨小

簾輕袞各自寒

更漏子

吳江秋泛

撥頭船菱葉港十里冷楓門巷江八洲柳千條赤闌第
四橋煮鱸香聽鳴語莫恨舟師催去空翠淡夕陽孤
飛帆度石湖

高陽臺

吳江葉元禮少日過流虹橋有女子在橋
上見而慕之竟至病死氣方絕適元禮復
過其門女之母以女臨終之言告葉葉入
哭女目始瞑友人爲作傳余記以詞

橋影流虹湖光映雪翠簾不卷春深一寸橫波斷腸人
在樓陰游絲不繫羊車佳倩何人傳語青禽最難禁倚
徧雕闌夢徧羅袞重來已是朝雲散悵明珠佩冷紫

玉煙沈前度桃花依然開滿江潯鍾情怕到相思路盼
長隄草盡紅心動愁吟碧落黃泉兩處誰尋

賣花聲

雨花臺

衰柳白門灣潮打城還小長干接大長干歌板酒旗零
落盡剩有漁竿 秋草六朝寒花雨空壇更無人處一
憑闌燕子斜陽來又去如此江山

酷相思

阻風湖口

社鼓神鴉天外樹見渺渺江流去向晚來石尤君莫渡
大姑也畱人住小姑也畱人住 杜宇催歸朝復暮轉
把歸期誤儘燈火孤篷愁幾許風急也聲聲雨風定也

聲聲雨

滿江紅

吳大帝廟

玉座苔衣拜遺像紫髯如昨想當日周郎陸弟一時聲
價乞食肯從張子布舉杯但屬甘興霸看尋常談笑敵
曹劉分區夏 南北限長江跨樓櫓動降旗詐歎六朝
割據後來誰亞原廟尙存龍虎地春秋未輟雞豚社剩
山圍衰草女牆空寒潮打

風蝶令

石城懷古

青葢三杯酒黃旗一片帆空餘神識斷碑纔借問橫江
鐵鎖是誰監 花雨高臺冷胭脂辱井緘夕陽畱與蔣

山街猶戀風香閣畔舊松杉

秋霽

嚴子陵釣臺

七里灘光見擁樹歸雲石壁銜照漁火猶存羊裘未敝
只合此中垂釣客星曾老算來無過煙波好況有个偕
隱市門仙女定娟妙當此更想去國叅軍白楊悲風
應化朱鳥翠微深鷓鴣飛處半林茅屋掩秋草歷歷
樓人影小水遠山遠君看滿眼江山幾人流涕把莓苔
埽

子陵梅福女婿叅軍謂謝皋羽西臺慟哭記有化爲
朱鳥兮將安居之歌

祝英臺近

任城登李太白酒樓

女牆低官柳暮俯首眺齊魯冷綬苔錢斷碣卧方礎最

憐酒醞花濃好春閒度更誰解金魚換取 啓塵戶遙
見十里帆檣催人動津鼓翠杓多情容我醉方去待他
明月高時臨風歌處也未許此翁千古

百字令 度居庸關

崇墻積翠望關門一線似懸檐溜瘦馬登登愁徑滑何
況新霜時候畫鼓無聲朱旗卷盡惟剩蕭蕭柳薄寒漸
甚征袍明日添又 誰放十萬黃巾丸泥不閉直入車
箱口十二園陵風雨暗響徧哀鴻離獸舊事驚心長塗
望眼寂寞閑亭埃當年鎖鑰董龍真是雞狗

柳梢青 應州客感

金鳳城偏沙攢細草柳擘晴絲九十春來連宵鴈底幾
日花前 禁他塞北風煙虛想像湖南扣舷夢裏頻歸
愁邊易醉不似當年

消息 度雁門關

千里重關憑誰踏徧雁銜蘆處亂水淖沱層霄冰雪鳥
道連勾注畫角吹愁黃沙拂面猶有行人來去問長塗
斜陽瘦馬又穿入離亭樹 援臂將軍鴉兒節度說盡
英雄難據竊國真王論功醉尉世事都如許有限春衣
無多山店酌酒徒成虛語垂楊老東風不管雨絲煙絮

滿庭芳 李晉王墓下作

獨眼龍飛鴉兒軍至百戰真是英雄沙陀去後席卷定
河東多少義兒子將千人敵一一論功爭誇道生來重
子信不媿而翁 前驅囊矢日三垂岡上置酒臨風歎
綠衣天下回首成空冷落珠襦散盡殘碑斷不辨魚蟲
西林外哀湍斜照法鼓影堂中

夏初臨

天龍寺是高歡避暑宮舊址

賀六渾來主三軍隊壺關王氣曾分人說當年離宮築
向雲根燒煙一片氤氲想香姜古瓦猶存琵琶何處聽
殘勅勒銷盡英魂 霜鷹自去青雀空飛畫樓十二冰
井無痕春風裊娜依然芳草羅裙驅馬斜陽到鳴鐘佛

火黃昏伴殘僧千山萬山涼月松門

霜天曉角

晚次東阿

鞭影匆匆又銅城驛東過雨碧羅天淨纔八月響初鴻
微風何寺鐘夕曛嵐翠重十里魚山斷處酒一抹棗
林紅

摸魚子

送魏禹平還魏塘

一身藏萬人海裏姓名慵注官簿秋深門巷堪羅雀只
共酒徒爲伍君又去認百疊寒山似綾鄉關路冰霜最
苦盼到得江南平波斷岸猶及冷楓舞竹林伴依舊
攀嵇交呂笛家琴調簫譜燕臺縱有尋春約忍負鏡邊

眉嫵君且住算我便歸遲定不過闌暑高荷大芋待縛
个茅亭能來夜話同聽紙窗雨

又題其年填詞圖

擅詞場飛揚跋扈前身可是青兕風煙一壑家陽羨最
好竹山鄉里携硯几坐菴畫溪陰裊裊珠簾翠人生快
意但紫荷烹泉銀箏侑酒此外揔閒事空中語想出
空中妹麗圖來菱角雙髻樂章琴趣三千調作者古今
能幾團扇底也直得樽前記曲呼娘子旗亭藥市聽江
北江南歌塵到處柳下井華水

燕山亭

七月十五日夜次友武會融谷覃九集謾
圖竹屋

新雨橫街竹屋晚涼曲徑憐初埽深淺素窠雪藕調冰
添撲半竿紅棗抹麗叢香問甚日吳船携到秋早漾一
片明河兔華圓了何用灝笛彈絲有骰子玲瓏玉舟
催倒檐牙罨網燈蕊捎蛾坐久露濃風小除却樽前數
詞客幾人同調諧笑渾不計過申犯卯

遊陂塘 荅沈融谷卽送其游皖口

記分襟秋河射角相逢今已春序草芽香徑看猶淺早
有落梅無數桃葉渡指鴈齒橋西舊是中山墅畱君且
住喚紅友傳杯青猿翦燭伴我夜深語 勞生事白髮
蕭閒未許軟塵糊又催去鐘山照眼青青在雲壑笑人

何苦携手步那得其春潮皖口揚舲度沉吟歸路算二
頃湖田一絲釣艇肯負綠蓑雨

又用前韻題查韜荒詞集

對層檐沉沉春酌驚心屢換時序浮萍蹤跡如相避飛
夢天涯難數芳草渡尋不到斷橋曲港龍山墅白門此
佳望塔火林梢江樓雁底莫共小窗語新詞好沈鮑
同時矜許朗吟且漫携去別裁悞惱迴腸曲轉覺良工
心苦邀笛步試喚取雙鬟綽板樽前度迢迢紫路計秋
水鱸香歸期未晚同聽豆花雨

又題顧茂倫雪灘濯足圖圖爲松陵女子沈關關
所繪

更無須調鉛吮粉神鍼繡出天巧江村自是科頭慣不
用雨中風帽木葉少向獨樹疎陰添个漁童小三高絕
倒笑淺菊莎邊問鷗磯畔千載有同調蓬門在深徑
客來頻埽東籬頗厭枯槁香山詩卷牛腰重六十平頭
未老貧也好那似我黃塵六月長安道秋風舉櫂問斜
日鱸香卜鄰定許歸計已先料

又題徐電發楓江漁父圖

怪煙波釣徒鄉里罟師如許青鬢浮家尙載閒書卷那
得身名全隱看一瞬把文賦詩篇樂府都經進披圖暗
晒怕白水撈鰕紅闌門鴨與爾便無分扁舟在蓼笠

綸竿未損攪人此日方寸清江幾曲楓林下多少鱸魚
荻筍歸夢准挂十幅蒲帆第四橋能認餅中宿醞算八
測塘邊三高祠下讓我醉眠穩

又寄龔衛圃

玉玲瓏閣前松石經過朱夏曾撫主人直待秋期近金
粟滿庭香雨新樂府早和徧贊洲笛譜賃房句

謂青士分虎

竹垞小住笑我若歸時畱君爛醉十日不教去西堂

冷孔翠應凋錦羽鹿麕高下騰距紅泥亭子方池外深
徑共誰延佇歲既暮想皖口鱗魚又好霑犀箸粉雲風
絮定吹到山樓叢梅凍雀把醺舊吟處

又贈吳天章

愛蓮洋無多行卷才華直恁明秀紛紛日下柴車至逸
藻吳郎希有李十九慣把汝詩篇三載藏懷袖今秋邂逅
便訪我城東京波殘月曉度玉河柳 交期合不在
時時握手傾心偶共杯酒六街聽倦鑿鑿鼓頗厭征衣
塵垢殘雪後待驅馬盧溝轉入孤山口蒼厓若曰伴翠
竹黃梅香林守歲清興爾能否

又題王咸中石塢山房圖

最撩人東華塵土騎驢蹇還往酒徒幸有王郎在更
喜鈍翁無恙傾宿釀話黛色堯峯燈下吳音雨清詩迭

唱畫十里山容茅堂石塢隱隱露薇帳南歸好髣髴

高居仙掌栖貧儘自蕭放解蘭焚茝非吾事只是海懷霞想春水漲趁三月桃花也擬浮輕舫拖條竹杖約燒筍林香焙茶風細來問五湖長

三

同青士重訪晉賢時書樓落成訂詞綜付雕刻
有懷周士季青在吳興

小舟紆梧桐鄉裏重來花已三度主人一笑還開徑樹
蕙滋蘭無數畱客住訝二仲依然未改當年侶別裁樂
府譜漁笛贅洲從今不按舊日草堂句東園好百尺
高樓容與綠窗多少雲霧騰觚飛爵須吾輩禮法由來
無取相爾女但只隔賢兄令弟添離緒來朝喚渡認酒

慢春橋茶檣夜柵便訪五亭去

臨江仙

藥甲齊開更歛柳綿欲起還沉一春閒望費愁吟酒旗
風著力花事雨驚心巷窄獨兒不吠樓高燕子難尋
熏爐小篆疊重衾綠陰猶未滿庭院已深深

金縷曲

初夏

誰在紗窗語是梁間雙燕多愁惜春歸去早有田田青
荷葉占斷板橋西路聽半部新添蛙鼓小白鷺紅都不
見但惜惜門巷吹香絮綠陰重已如許
花源豈是重來誤尚依然倚杏雕闌笑桃朱戶隔院秋千看盡折過

了幾番疎雨知永日簾錢何處午夢初回人定倦料無
心肯到閒庭宇空搔首獨延佇

卜算子

殘夢遶屏山小篆消香霧鎮日簾櫳一片垂燕語人無
語庭草已含煙門柳將飄絮聽遍梨花昨夜風今夜
黃昏雨

瑤花

午夢

日長院宇鍼繡慵拈况倚闌無緒翳帷翠幄看盡展忘
却東風簾戶芳魂搖漾漸聽不分明鶯語逗紅蕉葉底
微涼幾點綠天疎雨畫屏遮徧遙山知一艘巫雲吹

國朝詩集卷八
墮何處愁春未醒定化作鳳子尋香畱住相思人並料
此際驚回最苦亟丁寧池上楊花莫便枕邊飛去

摸魚子

粉牆青蚪檐百尺一條天色催暮洛妃偶值無人見相
送鞦韆微步教且住携玉手潛行莫惹冰苔仆芳心暗
訴認香霧鬟邊好風衣上分付斷魂語 雙栖燕歲歲
花時飛度阿誰花底催去十年鏡裏樊川雪空裊茶煙
千縷離夢苦渾不省鎖香金篋歸何處小池枯樹算只
有當時一丸冷月猶照夜深路

臺城路

晨紅纔射南窗影。犀帷被誰驚起。啁雀爭枝寒梅吐萼。
攪得雪花都墜。暗香簪未早。濕了當風畫羅衣。決箇點
熏籠。辟邪爐火。陷灰細。昨宵回憶並坐。問何曾酒釀
宿醒。如是橄欖漿酸。蛤蜊湯俊。猶道不消殘醉。曲屏斜
倚。看舊埽眉峰。漸低寫翠。半枕營騰。到日高翻睡。

南鄉子

明日別離人未戀。今宵月似銀。只願五更風又雨。飛到
暮啼殺杜鵑。催不去。

南樓令

疎雨過輕塵。圓莎結翠茵。惹紅襟乳燕來頻。乍暖乍寒

花事了畱不住塞垣春 歸夢苦難真別離情更親恨
天涯芳信無因欲話去年今日事能幾箇去年人

又

垂柳板橋低嬌鶯著意啼正門前春水初齊記取鴉頭
羅韞小曾送上省娘堤 花底惜分携苔錢舊徑迷燕
巢空落盡芹泥惟有天邊眉月在猶自挂小樓西

一葉落

淚眼注臨當去此時欲住已難住下樓復上樓樓頭風
吹雨風吹雨草草離人語

無悶 雨夜

密雨垂絲細細晚風約盡浮萍池水乍一霎黃昏小門
深閉作去聲弄新涼天氣怕早有井梧飄階砌正楚筠簟
冷香篝簡點舊時鴛被無計纔獨眠更坐起恁說愁
邊滋味翠蛾別久遠信莫致縱有夢魂能記尋不到長
安三千里料此夜一點孤燈知他睡也不睡

風蝶令

秋雨疎偏響秋蟲夜迸啼空牀取次薄衾携未到酒醒
時候已淒淒塞鴈橫天遠江雲擁樹低一灣楊柳板
橋西料得燈昏獨上小樓梯

祝英臺近

紫簫停錦瑟，遠寂舊歌扇。萍葉空池，柳埽還倦。便
令鳳紙頻書，片泥長潤，招不到別巢秋燕。露華泣猶
剩，插鬢金鈴，殘菊四三點。階面青苔不雨也生，徧縱餘
一縷香塵，轆轤曾印奈，都被西風吹卷。

憶少年

一鈎斜月一聲新雁，一庭秋露黃花初放了。小金鈴無
數。燕子已辭秋社去，剩香泥舊時簾戶。重陽將近也，
又滿城風雨。

臨江仙 金指環

削就葱根待束挂，將樞火齊炎殷勤搓粉爲君拈愛他。

金小小曾近玉纖纖
數徧檀郎十指帶來第五猶嫌
憑教麗句續香奩解時愁不斷約了悶翻添

秦樓月

吹笙

涼煙翠銀河湫湫光垂地光垂地小樓一曲月華如水
排成鳳翅聲初遞聽殘鴉管君須記君須記風簾卷
處那人雙髻

雙雙燕

別淚

問銀海水有多少層波歛愁飄怨含辛欲墮轉自把人
凝盼霑向長亭早晚定減了輕塵一半安排玉箸離筵
伴我樽前腸斷
偷看夜來枕畔傍鏡影初乾袖痕重

國朝詩錄卷八
按心心心上揔是別情難慣縱遣絲垂縷綰穿不起南
珠盈串裁得幾幅樞裙點點行行都滿

疎影 芭蕉

是誰種汝把綠天一片檐牙遮住欲折翻連乍卷還抽
有得愁心如許秋來慣與羈人伴惹多少冷風淒雨那
更堪一點疎燈繞砌暗蟲交訴待把蛛絲拭却試今
朝畱與個人題句小院誰來依舊黃昏明月暫飛還去
羅衾夢斷三更後又一葉一聲低語拚今番盡翦秋陰
移種櫻桃花樹

又 黃梅花

橫斜滿院見蜂鬢亂疊鶯羽新翦冷綬首枝疎影羅羅
休令雀豹窺見天教漏泄春光早把多少芳心輕展最
愁他金屋香寒長是曉風吹面折向妝臺看取對將
明鏡裏鴉額深淺澹月微籠椒壁初昏畱映謝娘詩卷
難禁一曲山香舞鳳蠟淚銅盤千點記夢中人在羅浮
杏子單衫烟染

玉樓春

柳

柔條曾記春前種乍起三眠妍手弄烟初羃歷態真濃
絮未顛狂絲尙重依依別緒長亭共舊雨殘陽空目
送一灣流水小紅橋畱與斷腸人作去聲夢

疎影

秋柳和李十九韻

西風馬首有哀蟬幾樹高下聲驟村外烟消水際沙寒
斜陽似戀亭堠絲絲縷縷紛堪數更髣髴葉初開候待
月中疎影東西思其故人携手搖落江潭萬里繫船
酒醒夜長笛京口讀曲歌殘曉露翻鴉蕭瑟白門非舊
赤闌橋畔流雲遠遮不住短牆疎牖話六朝遺事淒涼
張緒近來消瘦

瀟瀟雨

落葉

秋林紅朱足怪酸風一片舞遙堤任高高下下蕭蕭撼
撼策策悽悽岸芣籬根壓偏驚斷草蟲啼只有蒼涼月

來照鴉棲 却似游蹤不定 謂當南反北旋又東西縱
吟邊倚杖樽酒正堪携 然風錦故人來否 怕空山舊徑
一時迷颺颺 響悵無眠 夜聽到荒雞

長亭怨慢 鴈

結多少悲秋儔 侶特地年年北風吹度 紫塞門孤金
河月冷 恨誰訴 迴江枉渚也 只戀江南住 隨意落平沙
巧排作參差 筍柱 別浦慣驚移 莫定應怯敗荷疎雨
一繩雲杪 看字字懸鉞 垂露漸歛斜無力 低飄正目送
碧羅天暮 寫不了相思 又蘸涼波飛去

惜紅衣 薑

插架葵邊分畦蔗後日光穿漏看倚鴉鉏水泉淺沙溜
香苗暗斲正社燕歸飛時候湖口紅掌白芽愛連船來
又 厨娘纖手輕擘柔尖聽鳴小茶臼萼絲翠冷鹽豉
配能否一樣蟹胥魚鱠味勝蜜橙霜韭問東糟酣未思
勸故人新酒

洞仙歌

橄欖

南枝青子架唐梯難翦試灑紅鹽褪都徧笑燕姬就酒
歷口漿酸眉峰聚又早芳津頻嚥 河豚春正美荻筍
萼蒿和就香羹儘人勸更憶夜闌時配取茗柯消殘醉
滿傾壇盞看懷核兒童真嬌癡愛插向蘭膏燭花齊颺

西陽雜俎獨根樹東向枝曰木威南向枝曰檄檄嶺表錄子繁樹峻不可梯緣但刻其根下方寸許納鹽其中一夕子皆自落蘇子瞻檄隨詩紛紛青子落紅鹽王元之詩北人將就酒食之先斲眉皮核苦且澀歷口復棄遺白樂天詩漿酸橄欖新嘉靖燕壇杯中有茶字

綺羅香

和宋牧仲別駕詠螢

挾火難溫侵星易墜留拂井梧檐樹傍牖依闌暗裏慣
窺人住渾不辨鬢霧殘妝又何況羶塵纖步際新涼團
扇初閒輕羅撲付小兒女歲華深鎖院靜携照相思
錦字練囊縫取憑仗微風方便更教飛去逗屋角蛛網
圓絲遊葉心豆花斜雨恣意向月黑池塘夜闌高下舞

花心動

蜻蜓

舞拂波光齊上下，早是薰風池館蟬翼還輕。蓮尾偏長，
記取狐梨曾喚釣絲愛向人前立。是幾度欲飛猶緩，花
陰小。伯勞穿過也能偷眼。點水移持款款，乍紅裊淺。
枝翠停荷管卷，慢涼多。傍檻晚晴影，纖斜陽莎岸。有時
忽上玉搔頭，全不怕佳人羅扇。纖羽響一翦，鬢雲撩亂。

探春慢

河豚

曉日孤帆腥風一翦，販鮮江市。船小滌徧寒泉烹來深
院不許纖塵舞到聽說西施乳惹賓坐垂涎多少阿誰
犀箸翻停莫是生年逢卯閒把食經品第量雀鮮蟹
胥輸與風調荻筍將芽萼蒿未葉此際故園真好門鴨

關邊路猛記憶溪頭春早竹外桃花三枝兩枝開了

暗香 紅豆

凝珠吹黍似早梅乍萼新桐初乳莫是珊瑚零落敲殘
石家樹記得南中舊事金齒屐小鬟蠻女向兩岸樹底
盈盈擡素手摘新雨 延佇碧雲暮休逗入苔裙欲尋
無處唱歌歸去先向綠窗飼鸚鵡惆悵檀郎路遠待寄
與相思猶阻燭影下開玉合背人暗數

滿庭芳

佛手柑和嚴蓀友

青豆開房白牛露地春浮一樣根蟠風簾乍卷芳氣訝
燒蘭不比金仙十二承珠露倒瀉銅盤雙林底知他鹿

女幾度踏花看 園官傳送處烏皮旋設兔瓊初安勝
甘蕉乳臭橄欖漿酸携到六街三市津梁倦彈指霜寒
鏤酥片餘香未減分配小龍團

江城子

黃雀

江鄉風物客中論 傍籬根啓柴門翦翦西風紅稻倚斜
曠長記張羅秋九月南馬噉北陶村 充庖俊味我思
存坐黃昏引清樽持比香橙蒸栗色難分凝想流匙真
個滑全不數鴨餛飩

浣溪沙

惜別集句

惜別愁窺玉女窗 白遙知不語淚雙雙

權德輿

綺羅分處

下秋江

許渾

暮雨自歸山悄悄

李商隱

殘燈無焰影幢幢

元稹

仍斟昨夜未開缸

李商隱

又春閨

十二層樓敞畫檐

杜牧

偶然樓上卷珠簾

司空圖

金爐檀炷

冷幄添

劉兼

小院迴廊春寂寂

杜甫

朱欄芳草綠纖纖

劉兼

年年三月病懨懨

韓偓

鷓鴣天

鏡湖舟中

南國佳人字莫愁

韋莊

步搖金翠玉搔頭

武元衡

平鋪風簟

尋琴譜

皮日休

醉折花枝作酒籌

白居易

日已暮

即大家

水

平流

白居易

亭亭新月照行舟

張祜

桃花臉薄難藏淚

韓偓

樹心孤易感秋

曹鄴

臨江仙

汾陽客感

無限塞鴻飛不度

李益

太行山礙并州

白居易

白雲一片去

悠悠

張若虛

飢鳥啼舊壘

沈佺期

古木帶高秋

劉長卿

永夜

角聲悲自語

杜甫

思鄉望月登樓

魏扶

離腸百結解無由

魚玄

詩題青玉案

高適

淚滿黑貂裘

李白

浣溪沙

郊遊聯句

出郭尋春春已闌

宜興陳維崧其年

東風吹面不成寒

無錫秦松齡

青村幾曲到西山

無錫嚴繩孫友

並馬未須愁路遠

蘇舜

姜宸英

看花且莫放杯閒

蘇軾

人生別易會常難

長白成德

容若

解佩令 送趙秋谷

城頭畫鼓馬頭紅樹最無憀酒邊人去

尊彝

聽徧陽關也

未抵者番別苦

嘉善魏坤禹平

一程風一程涼雨

尊彝

斷橋橫

浦淺沙深塢翠綠環好山無數

海寧查慎行夏重

卸了朝衫換

獨速莎衣醉舞

坤

勝東華滿鞋塵土

尊彝

國朝詞綜卷九

青浦王昶纂

陳維崧 三十首

嚴繩孫 九首

錢金甫 一首

邱象隨 一首

孫枝蔚 一首

鄧漢儀 一首

王昶 一首

王嗣槐 一首

彭桂 一首

羅坤 一首

陳維崧

字其年宜興人康熙十八年以諸生召試博學鴻詞授檢討有迦陵詞三十卷

舊秋岳云其年與錫鬯並負軼世才同舉博學鴻詞交又最深其爲詞亦工力悉敵烏絲載酒一時未易軒輊也

望江南

寄東臯冒果民先生并一二舊游

如臯憶憶得暮雲天着醋紅螳經酒脆帶糟菜蛤點羹
鮮日日醉花前

又

如臯憶記坐得全堂幾縷椒雞閒說餅半罷花露靜焚
香絃索夜棖棖

又

如臯憶如夢沒如烟滿院嫩晴歌板脆一城戩月酒旗
偏過了十多年

又

如臯憶往事倍盈盈水郭題名新悵望板橋話別舊心
情雙髻可憐生

又

如臯憶按譜砌香詞傳語東君須婉轉此情莫遣外人
知除說與楊枝

梅子黃時雨

天水空濛只將暝纖愁催雨添恙乍過了東風楊花一
桁彈指還驚仲夏蕭蕭簷瓦跳珠響葡萄漲鳩婦喚晴
兒母眠浪惆悵他鄉誰傍弄爐薰藥裏聊自屏當料
故國樓頭茶烟新颺豆綠缸中梅水滿何時小啜龍團

餉苔衣長賦得苧衫難爽

丁香

竹茹竹間華也小如錢色如胭脂雨後叢生離離可愛惟陽羨山中有之他處所無

碎錦成斑餘霞美點小團臙脂隱隱正叢篁搖粉桃花
靨偷把烟梢扶襯竹郎門第好姑年小卯酒添暈滿湘
二女去遺積下啼紅盈寸淹潤被雨鶯啼喚出滿林
芳嫩櫻筍年光傷簫節候倣他輕俊小巷筠籃提入帶
笑爭相認似開元錢樣一縷嬌痕巧印

瑣窗寒

此地當年蕭娘妝閣綠窗幽靚傷春情思正日爇人微
病撚花枝悄近羅衣眉峯送語烟難定掩屏風六幅看

他細額安黃端正 那更人別後冷落舊妝樓溫家玉
鏡無端又上銀蒜零星還剩只從前簫局桃笙看來不
似今朝景便化爲玉翦重來還認紅香徑

春夏兩相期

初夏同友人東郊外訪吳絕園幽居

有羅羅水烟千頃夜來初浣離徑紫艷紅芳屋角牆頭
相映草深小巷入都迷竹暗層扉敲誰應淺樣風簾愛
他草閣居然舴艋 幽棲不似塵境只閒驅菊蠹小除
松瘦濕翠難名到此萬緣真冷牙籤亂插道書香板橋
對掩僧牕靚惆悵曾分半榻鶯聲一杯花影

東風第一枝

踏青和蓮庵先生原韻

簷溜纔停街泥乍乾花梢日影搖午陌頭霽景增妍水
邊烟光添嫵茜衫笑檢憶春在謝橋深處正沿堤絮燕
吟鶯吹滿一天風絮 籬杏慘紅飄塵土溪柳卷綠凝
門戶畫完江左亭臺釀成花朝節序爲歡併日况漸逼
韶光百五約鈿車來日重游又聽小樓宵雨

翠樓吟

小院蟲蟲斜橋燕燕倏倏起閒事當初妝閣影亂纖
在濛濛秋水餅金曾費只趁月藏鈎隔花傳謎依稀記
遞香窻眼浸嬌杯底 顚顚此日重來剩榆莢漫天苔
錢鋪地心情何處寫擬寫上繚綾帕子研來鬆膩怕未

便緘愁還難盛淚斜行字沉吟劃滿竹肌空翠

齊天樂

遊后妝樓

洗妝樓下傷情路西風又吹人到一綵山鬟半梳苔髮
想像新興鬧掃塔鈴聲悄說不盡當年花明月曉人在
天邊軸簾遙閃茜裙小如今頓成往事同心深院裡
也長秋草上苑雲房官家水殿慣是蕭娘易老紅顏懊
惱與建業蕭家一般殘照惹甚間愁且歸斟翠醪

過秦樓

松陵城外經疎香閣故址感賦閣係才媛
葉瓊章讀書處

鳥啄雙環蜨粘交網此是阿誰門第墜巾繞柱背手循
廊直恁冷清清地想爲草沒空園抵到春歸也無人至

只櫻桃一樹有時和雨暗垂紅淚
料昔日人在小樓
窗兒簾子定比今番不似望殘屋角立盡街心何處玉
釵聲膩惟有門前遠山還學當年眉峰空翠憶香詞尙
在吟向東風斜倚

紗窗恨

蝴蝶和毛文錫韻

開紅啞翠何時了漾春心一生輕薄誰拘管粉牆陰
花架底潛防紈扇畫梁前巧鬥紅襟描上鴛裙摺費泥
金

金鳳鈎

春夜同展成飲御之齋頭感舊

東風裡絳桃樹驀記起年時見汝紅芳正好濃香乍飽

俊眼相看如許 如今花放長洲路只我已朱顏非故
舊情如夢閑愁似海悶搗花鬢細數

臨江仙

寒柳

自別西風憔悴甚凍雲流水平橋并無黃葉伴飄飄亂
鴉三四點愁坐話無慘雪壓西村茅舍重怕他楫桡
同燒好留蠻樣到春宵三眠明歲事重門小樓腰

驀山溪

感舊

碧雲薄暮畫角誰家奏深院火熒熒好風輕翠幃微縐
冰輪徐上無語掩屏山金鉤瘦蛟綃透人在銀燈後
年時小苑良夜曾携手低掃淡黃蛾漫垂垂玉人紅袖

國朝詞林卷之
如今人去門巷也依然紅橋口香街右一帶青青柳

極相思

思夢

濕雲未歛香蟬斜欹枕屏前分明昨夜依稀往事院後
廊邊下了紅簾擎翠鑑悄不覺笑靨微圓濛濛脉脉
如塵似影記也難全

醉落魄

春夜微雪

春闈日暮輕寒已著櫻桃樹博山小篆飄香縷斜掩青
樓一陣銷魂雨夜深珂雪偏難住金尊小泛蘭陵醋
酒紅漸入香肌去嬾別金荷細對菱花語

七娘子

春閨

紅紫斜照人無語圓冰對淡春無緒陌上鶯啼梁間燕
乳夢中怕到銷魂處小樓春色留難住斜橋春水流
將去三月時光一年節序水晶簾外廉纖雨

愁春未醒

春曉

鶯窺燕壘上犀釘綃幃縈香雪夜珠和淚尙熒熒梳
洗誰忺懶扶殘夢倚圍屏依稀記得宵來微雨曾濕金
鈴綠水全昏紅閨半掩春困難醒風弄處釵花半朵
小似晨星理夢窗前生憎鸚鵡隔簾聽畫樓深巷賣花
聲到纔響還停

又牖外丁香花盛開感賦

琴來尙隔望處偏清筭開到此花闌珊春已在長亭滴
粉搓酥小紅牆角倍分明年年此際籠歸馬上遞徧春
城 昨歲看花有人禿袖壁阮調箏悵新來梁間燕去
往事星星只有隣花依依不作路旁情夜深難睡續紛
花影篩滿空庭

東風齊着力

花朝

春困初濃春愁難妥又是花朝蝦蟇半軸蛾絲不曾描
記得去年玉勒相逢在絲雨長橋鞦韆社繡旗不定畫
鼓頻敲 流水淒迢迢人不見粧成知爲誰嬌穠春病
酒雙臉印紅潮欲借鴛鴦機論恨回文字帶淚斜挑腸斷

也百花生日只是無聊

滿江紅

梁溪顧梁汾舍人過訪賦此以贈兼題其小像

二十年前曾見汝，寶釵樓下春二月。銅街十里杏衫籠，馬行處偏遭嬌鳥喚。看時誰讓珠簾挂，只沈腰今也不宜秋。驚堪把，且給箇金門假好長就。旗亭價記，爐烟扇影，朝衣曾惹。芍藥纔填妃子曲，琵琶又聽商船話。笑落花和淚一般多，淋羅帕。

夏初臨

本意癸丑三月十九日用明楊孟載韵

中酒心情拆綿時，節曹騰剛送春歸。一畝池塘綠陰濃，撲簾衣。柳花攪亂晴暉，更畫梁玉剪交飛。販茶船重挑。

第人忙山市成圍 驀然却想三十年前銅駝恨積金
谷人稀剗殘竹粉舊愁寫向闌西惆悵移時鎮無聊搯
損薔薇許誰知細柳新蒲都付鵲啼

琵琶仙

閨門夜泊用白石詞韻

暝色官橋消盡了帶雨綠帆千葉驛口夜火微紅瓊簫
正淒絕記醉倚銅街喚馬更間凭畫樓聽鳩無數前情
一番春恨橋燕能說 只細數花草吳宮除夢裡依稀
舊時節欲買韶光暫駐待來春榆莢縱尚有鷓鴣一舸
怕難禁伍潮堆雪悔殺麝帕鴛衾那年輕別

齊天樂

綠水亭觀荷

分明一幅江南景恰是鳳城深處野翠羅羅嫩晴歷歷
撲到生香萬縷隔花人語認雙漿堤邊采蓮兒女稻葉
菱絲隔紗長作打窗雨 亭亭波面斜裊西洲都蓋滿
睡鴟新乳碧盤迴廊黃泥小竈幾斜冷泉觀煮倚闌凝
佇記罨畫東頭舊尋詩路招箇烟橋飄儂溪畔去

喜遷鶯

雪後立春用梅溪詞體

飄絮綵綿正六花罷舞晴光初繡凍解蛾融雨收鴛潤
煖被笑聲烘就儘紅情綠意倩釵上綵幡輕逗春信淺
似纔青燕尾欲黃鸝脰 俛首空感舊暗省年時有箇
人清秀帕裏柑兒衫籠松子淺立粘鷄屏後別來情事

改懽懽也。渾如殢酒剩倦影與野塘小寺早梅爭瘦。

慶春澤

春影

已近花朝未過春社。小樓盡日沉沉。暝色連朝。江南倦客。難禁。門前綠水。昏如夢粉。雲遮失却。遙岑恁滿。裙不到溪邊。佳約空尋。年時恰是鶯花候。正黃歸柳。靨紅入桃心。舞扇歌衫。參差十里園林。東風吹織。絲絲滿做。半寒半暖。光陰問何時。日上花梢。細弄鳴禽。

月華清

讀芙蓉齋集有懷宗子梅岑并憶廣陵舊游

漠漠閒愁濛濛往事。勝似柳絲。盈把記解春衣。曾宿揚州。城下粉牆畔。謝女紅衫。菱塘上。蕭郎白馬。月夜正游。

船爭取綠紗窗挂 如今光景難尋似晴絲偏曉水烟
終化碧浪朱欄愁殺隔江如畫將半帙南國香詞做一
夕西窗閒話吟寫被淚痕占滿銀箋桃怕

嚴繩孫

字蓀友無錫人康熙十八年以布衣召試博學鴻詞授檢討有秋水詞一卷

張漁川云國初詞家小長蘆而外斷推秋水小詞情妙一時作青未易幾也樊榭論詞絕句曰閑情何礙寫雲藍淡處胡濃我未諳獨有藕漁工小令不教賀老占江南斯言當矣

浣溪沙

隙影餘香望未賒爲誰惆悵似天涯紫蘭重院謝娘家
生小暈眉臨却月近來書格愛簪花麝煤繭紙映輕

紗

又

綠擁紅遮惱暗期慧心無處不先知鳳屏東畔獨來時
忍待愁烟憐紫玉敢將詩句比紅兒等閒踪跡易猜
疑

南歌子

積潤初消砌輕陰尙覆城薔薇花外度流鶯却道年來
渾是不關情青鏡人如昨朱絃手盡生斷腸天氣舊
池亭夢裏紅香清露泣三更

雙調望江南

臨欲別何處見回眸一丈紅牆迷玉杵十年青鳥斷銀
鈎往事總成愁 憔悴盡花滿憶春游褰幌月華窺擁
被隔簾風影報梳頭終日重蘭舟

又

歌宛轉風日渡江多柳帶結烟留淺黛桃花如夢送橫
波一覺懶雲窩 曾幾日輕扇掩纖羅白髮黃金雙計
拙綠陰青子一春過歸去意如何

虞美人

征帆只是悠悠去去也知何處淚痕休清別時衣彈與
烟鴻猶得向南飛 月華幾夕清如洗料得卿歸矣暗

愁如霧又黃昏有箇盈盈相並說游人

踏莎行

過吳江

月魄分橋烟鬟迷渡如今不是長洲路
愁教幽夢暗相尋亂帆影裏人何處
細葦偷黃單綃引素去來渾是難分付
西風篷底博山香一絲絲似秋情緒

風入松

星移帆影月移沙秋思誰家別時不敢
分明語感春山暗損韶華又是中秋時
候西風幾陣歸鴉相思難遣夢交加水
澗山斜尊前常恨天涯遠況如今真箇
天涯更道重來應未待伊歸向曉紗

風流子

和友人韻

荀郎多恨後魂銷盡依約見傾城正梅粉乍舒舊家門
巷柳絲斜鞦別樣才情更幾度玉釵寒撥火銀甲夜調
箏斗帳珠瑩檀心偷展鳳燈香炮花睡難成無端歸
去也人何處夢裏應喚卿卿空記鶯兒酒煖杏子衫輕
怕油壁西陵雨停風慙畫船南浦綠怨紅驚恁日垂楊
深處重聽流鶯

小重山

桂花

一夜檀心怨廣寒風吹不盡小窗間漢宮黃額畫來難
珠簾捲惆悵夕陽山可記曉粧殘有人親插與鬢雲

鬱露華依舊濕闌干何曾是寂寞淚珠彈

錢金甫

字越江上海人康熙十八年進士召試博學鴻詞授檢討官至侍讀學士

一枝花

別意

接席撈纖手一笑開檀口良宵銀漢影漸橫斗更輕撥
琵琶低唱微酣後話別紅亭久似剖杏分桃心意人兒
常有調笑處橋平波縐往事難廻首當筵空憶徧高
陽友詩細寫烏絲寄問平安否奈絮飛殘柳念飄泊天
涯凭日同傾尊酒

印象隨

字季貞山陽人康熙十八年以貢生召試博學鴻詞授檢討官至洗馬

浣溪沙

紅橋懷古

清淺雷塘水不流幾聲寒笛畫城秋紅橋猶自倚揚州
五夜香昏殘月夢六宮花落曉風愁多情烟樹戀迷
樓

孫枝蔚

字豹人三原人康熙十八年薦
舉博學鴻詞有溉堂詞一卷

尤展成云豹人詞以飛揚跋扈之氣寫嶽崿
歷落之思其品格當在稼軒東坡之間

臨江仙

春到揚州人又去獨看東閣梅花高樓何處弄琵琶不
知人意懶空自門繁華帶雨早潮何太急望中離恨
無涯孤舟明日聽啼鴉多情江上客不獨爲思家

鄧漢儀

字孝威泰州人康熙十八
年薦舉博學鴻詞官中書

小重山

金陵步芝麓先生韻

柔曲闌遮柳線柔曾聞簫鼓夜美人游一從好事斷香
鈎西窗月不肯勸梳頭苦雨更深秋怎禁桐葉下一
更愁寒潮依舊繞城流無人處私倚闌江樓

王

吳字惟夏太倉人康熙十
八年薦舉博學鴻詞

望江南

思往事腸斷舊郵亭本爲情多將釀病却愁病久轉關
情花落又清明

王嗣槐

字仲昭錢唐人康熙十八
年薦舉博學鴻詞官中書

滿庭芳

感舊

歸燕穿烟殘霞樓樹晚來深閉離門遣愁無計獨坐醉
清尊欲問故園何處閒凝望敗葉紛紛西風起桂花香
老冷露溼山村少年歡樂事驚空鳳管曲罷宵分恹
盛筵易散青髻難存夢裏繁華已歇看朱戶綠徧苔痕
漁樵好負薪垂釣歸去正黃昏

彭

桂

字爰琴溧陽人康熙十八年薦舉博學鴻詞有初夢詞六卷

眉嫵

過馬湘蘭故居

記歌樓北里酒舫西洲南院風流最重過章臺路傷心
問藏鴉門巷都改佳人難再自畫蘭斑管埋彩只留得
剩粉殘脂裏有青山餘黛堪慨勝游前代忽玳梁摧

折珠廉飄碎油壁鈿車事當年恨桃花人面何在銷沈
香界換歡場禪燈梵唄但看取斜陽搖燕麥春風外

羅

坤

字宏載會稽人諸生康熙十八年
薦舉博學鴻詞有羅村詞二卷

祝英臺近

夏景

雨迷離烟靄澹又是暮海節露井榴花點點墮紅雪綠
窗誰管閒愁無人催繡且收拾鴛鴦針帖黛眉結昨
宵夢怯銀屏淚瀉帕痕濕燕語商量凭得畫闌熱幾時
柔櫓蘭橈相邀女伴同去採蓮花蓮葉

國朝詞綜卷十

青浦王昶纂

李良年三十一首

李符三十三首

李良年

字符曾秀水人監生康熙十八年薦舉博學鴻詞有秋錦山房詞二卷

曹升六云秋錦論詞必盡精蹊徑嘗謂南宋詞人夢臆之密玉田之疎必兼之乃工今讀是集洵非虛語

疎影 黃梅

歲闌記否著淺檀宮樣初染庭樹嬾趁羣芳雪後春前
年年點綴寒圃橫斜月淡蜂黃影長只傍短垣低護倚
茜裙欲撚苔枝凍鳥一雙飛去 依約荷圓磬小剪來

越鏡裏先映眉嫵蓓蕾勻拈細紋銀絲釵冷玉魚偏處
還愁羯鼓催無力沸蟹眼膽瓶新注正暖香夢惹江南
忘了隴頭人苦

暗香

綠萼梅

梅纔幾日早數枝開徧笑他紅白僊徑曾逢萼綠華來
記相識修竹天寒翠倚翻認了暗侵苔色縱一片月底
難尋微暈怎消得 脈脈清露濕便靜掩簾衣夜香難
隔吳根舊宅籬角無言照溪側只有樓邊易墮又何處
短亭風笛歸路杳但夢繞銅坑斷碧

催雪

紅梅

曲按江羅吟歆蜀髻翠羽不愁春淡訝瘦影無多遠村
先見四百峰頭開處認蠟粉牆陰閑庭院雪香千樹爲
伊低襯冷脂數點 弄晚湘箔卷正獵獵寒催墨雲遮
徧又橫幅半窻夕陽微閃懊惱杜紅兒去便嬾問東隣
尋踈豔總怪得石上吹霞化作斷魂風片羅虬比紅兒
詩有紅梅一絕句

柳梢青

懷友人在白下

春事閑探日斜風細葉葉輕帆燕子來時梅花落盡人
在江南 晚來何處停驂携手地王孫舊諳白下殘鐘
青溪遠笛今夜難堪

西興樂

追憶

天街燈火繡簾重去年今日曾逢斜蹴纖羅相思暗通
別後雲山數峰悵離蹤舊遊不再夢中芳草春雨茸
茸

疎影

秋柳

旗亭隴首正新霜乍點斜日風驟一片秋聲幾樹蕭疎
驚心十里津堠行人欲折還教住爲記得別離時候灑
渭城朝雨如烟曾向畫橋分手何處無情玉筵忍教
一夜裏吹墮江口繫馬無人認取寒枝惟有晚鴉依舊
相思最是鴛鴦渡應漸冷碧紗窻牖縱待得來歲春還

只恐那人腰瘦

綺羅香

桃源曉行同分虎賦

僧磬纔聞漁歌乍響一葉早潮催去背嶺人家雲碎著
簷如絮記前度也趁鳴榔料從此仙源非誤只長年見
慣秋山滿船涼翠不教住好懷都付倦旅細數青鞵
往事儘諸佳趣除了江南此景總無尋處轉溪灣錦石
分開又颯颯水紅花路甚西風吹亞霜砧數枝遮浣女
好事近

秦淮燈船

相對捲珠簾中有畫橈來路花燼玉蟲零亂串小橋紅
縷橫簫絡鼓夜紛紛聲咽晚潮去五十五船舊事聽

白頭人語

解連環

送孫愷似陪使朝鮮

歌殘朝雨聽都人
豔說酒樓孫楚纔
幾日天子呼來見
鞭影麴塵采風東
去埃沓程荒夢不
到朱蒙舊部想名
藩冠帶紫羅黃革
徧逢迎處書生據
鞍慣否脫絺衣
掛晚短亭談虎膩
小艇鳴綠江油信
蘭紙吟秋鬢雲遮
暑渡口楊花惜過
了一天春絮看雌
圖別敘紛紛綸梭
車載五

雌圖別敘並孝經緯周廣順中高麗所進

尾犯

筭

竹風春尾聽捎簷
剩有去年疎翠園
官笑指輕雷後迸

新泥斜碎籬邊乍見又穿過鄰牆背記先嘗最是江南
果然燕子來未 猶憶曉垞烟際山童擔向水市正採
桑時候除了蠶娘更無人諱禾中蠶時以笋損
同音多諱此字花乳甌
香朱櫻樹晚相逢長是待何日玉版閑尋青鞵重訪蕭
寺

惜秋華 牽牛花

亂插疎筠訝西風吹挂碧綃如剪昨夜露華涓涓冷波
盈盞生來只戀秋河開不到斜陽都捲誰伴有流螢半
簷涼蛩一院 婉約儘堪翫甚朝朝暮暮把鉛容頻換
微雨乍晴低翠幾番深淺年時憶控簾鉤映小窗暑殘

清簾休喚怕停梭那人愁見

留客住

鷓鴣

楚天杳凭筍輿羊腸似髮荒烟墮葉一片鈎輶蠻鳥南
飛故喚行客占斷千里秋江吟不了蘆花竹苦正聽殘
野店酒旗風裊江細繞窄渡人稀但橫斜照解語參
軍愁裏暗歌烏帽記得鄭家留句花落黃陵雨昏湖外
草更堪何處鎮清猿杜宇和他淒調

月下笛

分虎客秣陵葉衡周歸以書來索予倚聲
即用舊圖寄融谷調奉簡

白下迢迢金荃勝侶停杯念遠相携處更有吾家未歸
鴈浮名自笑輕于絮傍酒社詞場總倦訝題殘紅藕書

來猶問向時吟卷 望斷江南岸
夢桃葉鶯捎柳絲鴉
散昔遊繫纜潮痕雲影頻換
鏡詩憶埽僧牆粉了翠壑
前盟未晚便結箇小茅齋
爾一雙斑管

齊天樂

蟬

滿階榆莢過牆竹日長初埽三徑
鳩婦呼殘燕雛飛後
不許草堂人靜隔林遙聽
恰吟侶參差綠陰遮定
長記拋書聲聲如在最高嶺
柴關應誤來客亂喧晴葉底
剝啄難省葵扇慵揮
桃笙乍展午夢幾番催醒
井梧秋冷漸移近
朱欄有人閑凭一笑迴身
鏡中看鬢影

桂枝香

蟹

早杭刈了正墜葉點溪半篙秋水郭索無聲橫蹴晚涼
踈葦延緣野老投竿罷又潛來鷺沙邊艤滿携雙簾數
錢長在曉風漁市 又重趁天涯倦旅把江北江南閑
較風味喚煮看繁小疊赭衣匡背珊瑚難得春葱擘迸
微紅水晶盤膩菊香搓後長亭一任酒帘搖翠

又憶往

粉牆如雪認枇杷幾樹是相思葉水榭吹紅點點上他
裊屨玉鈎暗捲玲瓏竹儘移鐙載愁載檝鞦香細落嬾
雲微映枕函斜月 記密寫薤書螺盒有蛺蝶能來鸚
鵡能說十載征衫只做一番離別乞漿崔護今憔悴怕

重尋笑桃人。慙如何夢裏相逢。依舊好花時節。

高陽臺

過拂水山莊感事

屋背空青。牆腰斷綠。沙頭晚疊春船。一篷東風斜陽淡。
壓荒烟。尙書老去蒼涼甚。草堂西貼石疎泉。倚香奩天。
寶宮娥愛說開元。松楸馬鬣都休問。卻土花深處也。
當新阡。白氈紅巾是非付與殘編。石家金谷曾拌墜甚。
遊人尙記生前。更悽然燕又雙飛。柳又三眠。

百字令

田鬲淵寓齋元夕小飲同蒼水謾圖其年竹垞湘舞山農限韻

迢迢柳市。今宵月又接。隔年離緒。記曲津橋人倦也。合
對江南舊侶。扇底輕塵吹紅淺。埒當是春佳處。韭芽花

片停杯共話羈旅 想得斑竹捎檐低垂香箔角里排
燈路鈿影半遮星點外乍歇小樓箏語老憶閑情相看
一笑茗芋盧家醕更闌試聽東風似喚歸去

燕山亭

七月十五夜集護國齋雨坪倡

燕月微黃纔到竹間澹著江南影箔卷半窗露滴涼波
書屋短於烟艇底問青旗笑臘釀秋厨猶剩紅凝鬪古
色甌香汝哥官定 還記舊雨梅邊又一葉飄梧者番
清景吳根夢去蟹斲魚牀西風暗吹笳笳旅話今宵都
忘了五湖歸興更靜便挑盡燭花也肯

踏莎行

金陵

兩岸洲平三山翠俯江豚吹雪東流去故陵殘闕揔荒
煙斜陽鷓鴣背分吳楚青雀鈿釭朱樓畫鼓冥冥一片
楊花路遊人休弔六朝春百年中有傷心處

暗香

水仙

秋花過了對滿除殘葉雙鬟催埽試卷重簾別有幽香
送晴沼漢口烟波正杳況洛水微茫難到想羅襪定怯
深寒戀此一亭小清曉爲誰好待翠被香殘冶妝侵
早下階一笑摘取憐他鬢邊裊欹石淺欄相映應不比
鏡中低照釵溜也斜立處更須悄悄

解連環

同青藜緯雲彥吉小飲旗亭觀劇

冷雲吹絮恨片時遮斷斜陽歸路一帶寒沙貫酒旗輕
掛在晚烟疎樹小橋紅板曾傷別又底事玉驄驕駐怪
倡條冶葉牽情春向狹斜無數十二廻欄深倚有翠
鬟如畫攜手堪賦笑語分明記得曾逢不省舊遊何處
尊前畫壁重相見簾外辛岑如雨且休調鈿管銀箏只
許鶯聲低訴

減字木蘭花

重經白馬渡

楚隄行徧記得瀟湘簾底見棹倚楓根客夢楊花共一
村鷗邊再宿前路分明烟水淥門掩清溪風起蓮東
月墜西

催雪 珍珠蘭

碎雨跳荷連星綴柳楚晚別箋蘭譜想三斛曾量芳名
借汝開也只如含蕊趁月影微黃黏清露紋紗靜掩一
珠蜂背卻教偷去 闌暑眠正午又生結半奩小鬟催
煮甚坐遠偏聞細尋無處記得漳江乍買有嶺外人家
迷香路見十十五五釵梁風顫晚街游女

瑣窗寒 倭查

鳳背勻初鴉翎染徧暗藏銀孕塵飛不上閃閃研光如
鏡鏤旋螺慣填小幅雲峰花鳥纖毫釘料璫魚深貯鷗
斑蛾綠鎮教相並 几淨看交映想浮天一葉海帆風

國朝詩集卷一
猛鈿工市罷估客乍添歸興甚求仙徐福不還秦女曉
梳猶未省待清吟試續香奩衍波牋寫贈

三姝媚

十姊妹花

曲欄春已謝又綠刺鉤連數莖開乍過雨晨粧看香肩
初並薄寒亭榭聯袂難分還只繞薔薇舊架採摘誰憐
一段閑愁低徊自寫小鳥呼名曾借任啣了紅巾啁
啾不下湘水三妃更楊家五隊嫣然相亞睡起殘脂點
石上青苔如畫自願無媒不願東風催嫁

摸魚子

尊

記年時千絲紫金名泉催汲寒溜紅尖細糝花蕊滑竹

下厨烟清畫鹽下後問此味雲間小陸還知否酪漿在
門但酥樣釵莖難粘雙筯說甚剪松韭 家山遠鏡面
拖藍依舊浮名何似杯酒木蘭艇子牽情處摘得蒲籠
消受秋八九又不比春三二月青青候書傳素手道越
客遲歸吳鮮早賣輪與釣魚叟

惜紅衣

荷花紫草

瓣著燕支房勻茵萼暖風吹徧不向清漪柴門望中遠
嫣然自笑付蝶翅蜂腰閑占荒岸纔過禁烟一村村都
豔 黏空萬點香路嘶騮花髮香難見乍疑仙褥曾門
武夸慢添箇冶粧人到似疊錦江春浣只慣遮羅襪不

比綠燕痕淺

蝶戀花

渡口

映水藤邊絲萬縷，逞事驚心，柳下斜陽路。渡口蒹葭曾
小住，年年別有流紅聚。燕也移巢誰可語，指點分明，
翻似無憑據。鏡檻梨花留一樹，春風又到凭欄處。

買陂塘

寄題俞丹嶼菰雪邨莊

湖蒼茫中央，宛在風人曾寫高致。而今再見東湖隱，開
箇柴門，湖觜花數里，到香色都消。占斷橫斜水，尋詩徒
倚想，魚板無聲，堊雲欲壓沙雁一行起。葭牆短波影，
半沉窻紙。畫圖佳絕，無此垂楊著絮，梨吹粉，何似薄寒。

秋尾清冷意便閑笑人間亭院爭紅翠歲云晚矣待郭
索緣灘鱸魚出網沿月小舸橫

李符

字分虎一字耕客嘉興人布衣有耒邊詞二卷

朱竹垞云分虎游屐所向南朔萬里詞帙繁富殆善學北宋者頃復示余近稿益精研于南宋諸名家詞乃變而愈上矣高二鮑云耒邊詞能盡掃白科獨露本色在宋人中絕似竹山

河滿子

經阮司馬故宅

慘澹君王去國風流司馬無家歌扇舞衣行樂地祇餘
衰柳棲鴉贏得名傳樂部春燈燕子桃花

綺羅香

春遊

屏山翠遠鏡檻紅深好在一旬無雨結伴携筇愛煞踏
青柔路正花底夢蝶飛來又溪上盟鷗招去隔垂楊水
曲橋橫晴絲引入斷魂處 畫樓誰弄鳳竹礙閒雲一
朶欲飛還住幾樹斜陽啼過亂鶯無數最難禁片霎歡
游重喚起那迴愁緒待重尋含笑桃門冷烟迷斷浦

齊天樂

茗南道中

野塘水漫孤城路曉來載詩移艦柳惺汀荒邱遲宅壞
急雨鳴蓑千點綠燕如染映翠藻參差鶉鴝能占沽酒
何村花明獨樹小橋店 昔遊如昨日耳記深深院宇
綺羅春艷粧閣懸蛛舞衫化蝶滿目繁華都減濕雲乍

歛露浮玉遙峰相看無厭漁唱滄浪荻根燈又閃

摸魚兒

吳清峙屬題秋圃歸帆圖

鏡奩中白蘋風起扁舟乘興容與下峰未抵皋亭好便
挂歸帆南浦朝至暮聽兩岸蕭蕭一派秋聲去貪看雲
樹任倚榜沉吟推蓬欲坐收拾眼前句閒情好寂寞
誰爲伴侶漫尋沙嘴鷗鷺有人更在烟波外欲向畫中
呼汝留且住同泛入蘆花野館橋橫處銜杯共語怕索
米長安馬頭鞭影催別短亭路

解連環

句曲客夜寄答里門諸故舊

草青南浦最難堪又別舊鄉儔侶共攀摘岸柳相貽聽

吹入玉龍斷魂如訴水市橫橋原不是短長亭路甚沙
邊一舸歲歲逢春便載愁去 煙郵倚篷暗數更馬頭
新月山縣須住念故國如此良宵有詩叟詞仙坐醉花
圃吟榻燈殘正客夢欲來尋處奈衾寒酒醒風力不眠
更苦

摘紅英 春雨惜花

鴛衾冷春眠醒溫磨爐火銷金餅簷聲細添愁思料得
烟梢都無香氣 粧樓凭鈎簾聽暗頃一地胭脂凝
心髻簪花未怪他紫燕銜來紅碎

珍珠令 珥

鍼姑穿綴瓊酥瑩低低並鉤一縷紫磨金冷更結小珠
圓去香肩幾寸綠霧鬟邊原共影隔嬌面鎮長孤另
孤另還贏得黃昏雙棲鴛枕

翻香令

指環

無多紫膽煉圓輕慣鑲紅透亞姑明蔥根約并刀把聽
丁丁微亂剪衣聲托香腮睡夢初醒驅痕斜帶爪痕
生銷魂處同携手記袖中偷解昔年曾

解連環

釧

腕闌翠簡約雙彎雪藕袖綃斜捲看幾番著就箱邊是
鏡臺曉粧初罷柔荑浣攀折花枝露月樣柳金條軟愛

欠申時節一齊落後顛酥勻滿 檀郎有時去遠驗舊
痕消瘦兩頭頻歛定想到贈結殷勤幾磨弄循環暗思
千徧褪貯雕奩待見後泥伊重綰隨玉臂貼茵當枕最
教魂斷

翠簡腕闌卽釧也見元氏掖庭記庚信鏡賦就箱邊而著釧

好事近

夢裏舊池塘綠徧芊芊芳草鴛鴦無人行處更不聞啼
鳥 冷香點地錦模糊鳳子曾尋到長日東風吹過只
亂紅難掃

南浦

秋水用碧山樂府韻同蘅圃賦

好景在滄浪照亂山冷楓翠渚紅染前度浣衣人西風

裏安排碧砧初編載詩載酒書船重到風濶淺藕塘萬
葉憔悴盡了蘆花一片臨流曲榭依然早不見雙雙
掠波紫燕遠浦夕陽含秋奩影但有惻鴻蒼點冷冷遠
郭幾曾解洗江南怨莫愁湖畔停蘭棹夢入鱸魚鄉遠

疎影

帆影

雙橈且住趁風旌五兩掛席吹去側浸紋波一片橫斜
不礙招來鷗鷺忽遮紅日江樓暗只認是涼雲飛度待
翠蛾簾底憑看已過幾重烟浦搖漾東西不定乍眠
碧草上旋入高樹荻渚似灣宛轉隨人消盡斜陽今古
有時淡月依稀見總添得客愁淒楚夢醒來雨急潮渾

倚榜又無尋處

華胥引 夢

試粧纔罷乍坐還眠任歌翠枕漸歛嬌波嫵雲釵溜渾
不省屈戌難鎖柔魂度柳檣無影暗逐春驄徧尋烟水
雲嶺 此際相逢道真真畫眉人並不知紅日窻間移
桃過杏分付呢喃雙燕近前催醒重疊花陰怕伊迷了
鴛徑

淒涼犯 爲友人詠枕

翠鍼繡罷吳綾窄蝶棲並蒂花蕊碎搓碧艾玉纖裝就
綵絲縫細蘭闥密意願長是羅幃並倚又誰知雙鸞輕

別抱向客窗睡 暗墮釵梁處燈照孤眠不堪重記鬱
金油澆剩桃鬢舊痕香賦一半紅稜慣留待人來夢裏
怨樓角月斜曉箭又驚起

秋思耗

得秋錦家兄都下書

十四樓邊客倚小山望斷薊門消息玉屑瘦書錦砂圓
印遙墮鴻翼剪孤燭開封但言秋到夢故國記別離西
水驛正菱露侵裝荻風吹纜絮語曉雞聲裏月殘林黑
悽惻年華又隔料柘垣敗葉初積賦工何益枉教揮
盡一牀健筆怕舊侶叢鷗笑人苔翠生釣石兩鬢色應
未白筭不若歸來滄浪隨意泛宅樵弟漁兄計得

惜紅衣

和家兄賦荷花紫草

檀粉輕勻蓮衣碎顫別生春艷麥乍青時空畦早開偏
分明疊錦吹幾陣東風難捲孤燕貼地飛來似并刀裁
剪 秧田小岸桃葉人歸香弓也留戀斜陽影裏紺袖
門深淺畫榭翠尊俱載坐比繡茵還軟愛杏村花舞添
了紫塍紅點

露華

和竹垞賦水蓼花

翠痕染露占曲渚遙灘慣宿鷗鷺冷穗蘸霞密綴星星
紅黍遠遮一片漁磯相映水萍搖暮秋容好江樓望時
有人吟苦 依依送別南浦似那日秋娘香淚凝聚最

惜雁風吹老漸點蘆絮雨後半倒涼枝碎灑釣蓬移處
波浪起烟叢繫船且住

惜秋華

牽牛花

弱不禁風繞葡萄珠架碧圓如磬側向曉樓盈盈乍窺
窻鏡綃衣似涉銀灣蘸點點冷波猶凝消領愛空庭嫩
涼鈿竿葉襯翡翠色堪並恰飛來小小踏柔絲相映
只恨冶容易悴也同朝槿那人日午妝成待替伊摘簪
香鬢籬徑奈重尋已無花影

夢橫塘

菱

鏡花晝合絲蔓秋肥角尖涼觸波底一道香繩早攔截

半塘秋水斷浦歌沉夕陽人遠采殘烟際喚雙橈並撥
就買湖邊船頭載蘋風起 蟾蜍股疊晶盤付尊前素
手輕擘紅碎嫩玉分嘗便雪藕也輸甜脆過重九吳娃
都散蝶葉參差剩寒翠更煮浮根鼎娥傳送當園蔬銷
醉 吾鄉多採菱根煮食味極俊美

釣船笛

春漲一溪渾來往紫萍漂處撐過桃花樹底滿青蓑紅
雨 小橋平溜總無波船尾不須櫓隨意溪南溪北任
香風吹去

又

萬葉墮寒村目極水平天遠欵坐船頭相對欠青山在
眼 瓶山草沒甌山低行到半山半恰被梅花留住一
蓬兒香片

又

曾去釣江湖腥浪黏天無際淺岸平沙自好筭無如鄉
里 從今只住鴨兒邊遠或泛茗水三十六陂秋到宿
萬荷花裏

柳梢青

和沈山子西湖後游

前度芳游裙腰草外綠漾輕舟渡口飛花波心掠燕人
倚紅樓 重來緩控嘶騶悄不見疎簾上鉤一鏡空香

雙螺斜照都是春愁

生查子

松翠石楠紅寒食孤墳路素手摘金鹽苔印弓弓步
細漿畫橋邊微雨催歸去風度鬢花香吹到回眸處

拜星月慢

賣酒樓高彈箏人在只隔城西小嶺趁月敲扉滿春衫
花影捲珠箔千縷翠烟不斷香裏看伊粧靚一曲蠻絃
露柔荑尖冷別離時心許鴛鴦並曾相約且種菖蒲
等夢想水吟雲情怨天涯桃梗悔當初不載烟波艇如
今見候火茸蘭映倩傳書飛過衡湘怕新鴻未肯

淒涼犯 八洲晚泊

蒲荒菰冷吳淞路日沉遠浦雲黑今宵最苦鄉城未遠
已同行客江清八洲又從此籤程第一料馮眉還應笑
我歲歲挂帆席 忽灑蕭蕭雨漸引新愁起拋吟筆翠
尊縱在怎能消此時岑寂況見燈昏便想到鴛樓錦瑟
艤扁舟漫近戍柝怕聽得

揚州慢

廣陵驛舍對月遇山左調兵南下

老柳梳烟寒蘆載雪江城物候秋深怨金河斗雁斷續
和疎砧記前度邦溝繫纜征衫又破愁到如今悵無眠
伴我淒涼月在牆陰 竹西歌吹甚聽來都換笳音料

鎖篋携香籠燈照馬翠館難尋淮海風流秦七今宵在
夢更傷心有燕犀屯處明朝莫去登臨

天香

龍涎香

星挂浮槎珠探遠島蟠螭碎沫輕杵旋裏鯨綃試溫鳳
炭心字氤氲千縷輸他睡鴨頻颺著剝蔥添炷雨暗恐
來鱗爪東風莫吹烟去凭肩小窻月午記濃熏隔花
迷霧袖惹餘馨銷盡又增愁緒夢入鈿牀尋覓空贏得
韓郎斷腸句嚙鎖金蟾知拋甚處

瑤花

玉韞珖

藥珠翠結密簇柔梢細看來疑葉花師昨夜都咒變春

暖忽堆晴雪，弄簫人去，還留得女銀香。料葳蕤舊觀，
開時無此碎瓊稠疊。分明似玉玲瓏，但綵線同心，猶
未穿揭。團團素影，渾不見，粉樣幾雙。栖蝶良宵十五，映
天上纖阿宮闕，傍青池照水，俱圓難認。一丸真月。

綺羅香

和蘅圃芸築題壁

截竹編扉，插籬分徑，新拓軒窗都了。隔絕紅埃，但有香
綿飛到，借牆外乳管陰濃。護欄曲米囊花小，乍移栽短
短山梅，並棲便見翠衿鳥。畫簾長是半捲，放得沉醺
一縷茶烟，同裊揜點藏書次第。籤牙衣縹，送春時無著
閒情，銷夏地待添吟草。更商量結箇松棚，納涼看月好。

尾犯筍

竹秋小雨早苔痕青坼尖微露參差漸過牆西角記
銜蟬埋處北窗漫剛愛長夏陰遮午但抽芽莫遣當屏
恐妨山客來去玉東嫩含芳乳汲泉烹出翠釜自燕
飛春社嘗到清和豆新同煮蠶事闌時村村屋背短筠
捎樹拾烟籜待製輕鞦挑鞭重踏寒圃竹以三月爲秋
舊傳埋貓引竹
吳俗至今行之故有銜蟬句

玉女迎春慢螺屏

裁取衫心攢犀滑一幅冷光如鑑細切鸚螺脆片寸寸
絲絲填徧峰迴波轉巧簇就水村花豔鵲飛處金屑

碎鋪添出沙軟 偏宜日影中看移紅換碧易迷春眼
說甚調鉛吮粉十二巫雲依展移來深院合村與冶粧
人玩小立頻窺誤却午窗鍼線

摸魚兒

寄二鵬

幾年來月泉吟社約游都在鄉里舍南舍北招尋慣祇
隔一重烟水吟且醉從不負免華圓缺花榮悴難忘最
是其詩納樓茶仙皆山鸚林挑燭話到梵鐘起江南
好留住春船行李西風旋又吹袂雁沉蘆響搖秋雪舊
國應凋寒翠愁夢裏也只戀漁灘埽葉炊菰米賦歸須
記在養鴨河邊賣魚橋外商略結隣事